



## der lieben lunge not

anti-wärbespots für roucher u mitroucher

**Text: Hans Jürg Zingg**

**Melodien: Hans Jürg Zingg / Volkslieder / Mani Matter**

**Begleitimprovisation: Edwin Peter**

### schlafliedli

zygarettli schtosscarettli  
nach dryssg jährlig ligsch im bettli  
u dys chiiche du arme calööri  
tönt win es roschtigs gartetööri

zygarettli schtosscarettli  
nach dryssg jährlig ligsch im bettli  
z röiklen ischs dr nümm so drum  
brchunnsch ja jitz au tag morphium

### azellvärslü

players camel kent  
rouke das isch tschent  
rio 6 havanna  
rouke hilft entspanna  
stella filter stuyvesant  
rouke macht eim intressant

wär so blöde seich vrzeit  
wird i schäm-di-egge gschteut

### **dr cäsar christoph chräbs**

dr cäsar christoph chräbs  
dä sitzt im hotel chräbs  
zum znacht nimmt är e chräbs  
u nächär sibe schnäps

ir lunge het är chräbs  
ja lungechräbs das gäbs  
vom vile rouke gäbs  
de mängisch lungechräbs

dr cäsar christoph chräbs  
weis nüt vom lungechräbs  
verschlingt vergnüegt sy chräbs  
u syner sibe schnäps

u hoffet är erläbs  
no mängisch dass är chräbs  
chönn ässe hie im chräbs  
chräbs isch sys liebschte gricht

### **anti-nikotinitiative**

i dr erschte klass da ischs es bäredräckli  
i dr zwöite klass da ischs es nieleschtäckli  
i dr nünzte klass da ischs im tag es päckli  
u mit füzgi isch der sarg de zue

wen i cheiser wär de tät i ds land regiere  
aui lüt wo rouke i ne söistall schpere  
aui tubakbletter uf e mischt la füere  
wen i cheiser wär das würd i tue

u itz no chly weniger extremistisch-primitiv, e chli  
reapolitischer gwüssermasse

wär i bundesrat de tät i ds land regiere  
uf d roukzügpäckli ds gift la deklariere  
un uf jedes päckli chiemt e totegring  
u zwar miech i das wäg üsne ching

### **a propo ching**

dr hansjakobli u ds babettli  
di suggen am ne zygarettli  
u ds chindli i babettlis büüchli  
ziet zfride mit am nabuschlüüchli

(1977)